

“Kultura, hirietan eraldaketa urbanistikoko handiak egiteko aitzakiazat erabiltzen du Donostia 2016k”

Donostiako Piratak

argia.eus-en ikusgai



Bergara 1936, gerra eta errepresioa

Euskal Herriak jasan zuen erreprezioaren benetako dimentsioa ezeztatu zuen in-punitatean oinarritutako eredu politiko batek. Egiaren eta justiziaren alde egindako dokumentala da hau.



Nire amaren hiria

Bilboko euskal kulturgintza-ren egoeraren erradiografia, Oihana Bartra bertsolariaren eskutik.



LANDER ARBELAITZ MITXELENA

Errausketaren aurkako borroka indartzeko batzarra egin dute

Lander Arbelaitz Mitxelena

@larbelaitz

Zubietako herritarren laguntza eskaerari erantzunez, han bertan batu dira urtarrilaren 16an erraus planta proiektuaren aurka egiteko lanean ari diren Gipuzkoako hainbat talde eta norbanako. Guztira 70 bat lagun bildu dira, eta asmoa borroka hau berraktibatu eta gizarte jasangarriago baten alde lan egitea dela zehaztu dute. Hurrengo batzar irekia otsailaren 13rako finkatu dute.

Ondorengo talde eta mugimenduetako kideak batu dira, besteak beste: Hernanin Zero Zabor, Oñati Zero Zabor, Usurbilgo taldea, Lasarteko Aire Garbia, Tolosa Zero Zabor, Errausketaren kontrako Koordinadora,

medikuen taldea, Zero Zabor IBE, Ekologistak Martxan, Eguzki, Ernai, Irabazi...

Elkar aurkeztu ostean, bakoitzak 2016rako dituen proiektuak elkarri jakinarazi dizkiete. Manifestu bat ere irakurri dute, errauste planta bizi ereduarekin lotuz. Ondoren, hiru lantaldetan banatu dira, elkarren koordinazioa eta informazio trukea hobetu eta ekimen zehatzak prestatzen hasteko.

Bestalde, batzarrean parte hartu duen Andoaingo Ipar Haizea herri plataforma sortu berria da. Datozen asteetarako Andoainen antolatutako bi ekitaldiren berri eman dute Ipar Haizeako kideek: otsailaren 20an “Arduraren aldeko giza katea” osatuko dute eta martxoaren 12an Osasunaren aldeko martxa burutuko.

“Salbuespen legediaren amaiera lortzeko ekarpena izan beharko luke akordioak”

PERNANDO BARRENA, 04/08 SUMARIOKO AUZIPETUA


Espainiako Auzitegi Nazionalean ohikoa ez den akordioa itxi dute 04/08 sumarioaren auzian eta ondorioz, EHAK eta ANVren izenean aritzeagatik auzipetutako 35 lagunetik inork ez du kartzelara itzuli beharko. Baina “dena da ETA” teoria berretsi behar izan dute auzipetuek, ETArekin nolabaiteko lotura izan zutela jasotzen baitu akordioak. Indarkeriarekin lotutako jarduna arbuiatu eta eragindako biktimak eta mina aitortu dituzte. **TWITTER (2016/01/13)**



EMAKUME KIROLARIAK, EGUNKARIETAN BAZTERTUTA

ASPI/C/ Eusko Jaurlaritzako Gazteria eta Kirol Zuzendaritza

Argitaratutako berriak




15.316 berrietatik 760 bakarrik dira esklusiboki emakumezkoenak (%5).

Azaleko titularrak



Modalitateak



Emakumezkoen kirolaren presentzia eta tratamendua Araba, Bizkaia eta Gipuzkoan banatzen diren egunkarietan. Datuak 2013-2014ko denboraldikoak dira eta honako egunkariei dagozkie: *Berria, Deia, Diario de Noticias de Alava, El Diario Vasco, El Correo* (Araba eta Bizkaia) *Gara, Mundo Deportivo, Noticias de Gipuzkoa, Marca*.

ONDORIO KUALITATIBOAK

Emakume kirolarietara abizenak kentzen zaizkie askotan, eta izena soilik uzten. Honek ez dio kirol arloari soilik eragiten.

Kirol berrietan, bizitza profesionala nabarmentzen zaie gizonezkoen; emakumezkoen, berriz, familia artekoa.

Estereotipoak: apaintasuna, feminitatea, fisikoaren inguruko aipamenak, paternalismoa.

Emakumezkoen garaipenak gutxiago baloratzen dira.

Ez dio axola kirolariak diren ala ez diren. Hedabide batzuetan, ohikoa da kirol informazioarekin batera biluzik edo arropa gutxirekin dauden emakumeen argazkiak aurkitzea.



"Zer izango zatekeen Aylan txikia, heldu izatera iritsi balitz? Ipurdi-jarraitzailea Alemanian" diote Charlie Hebdo aldizkarian. Polemika piztu du Riss komikulariaren gustu txarreko txisteak.

Gure emakumeak bortxatzera datoz

Onintza Irureta Azkune

@oirureta

Alemaniako Kolonia herrian 516 salaketa jarri dituzte Urte Zahar gauean ehunka gizonak emakumeei egindako erasoak medio, 237 salaketa sexu erasoengatik. Hedabideek erruz informatu dute Koloniako bortxaketa "oldeaz". Iritsi al da sexu indarkeria estatu mailako gai bihurtu dela ospatzeko garaia? Ala emakumeen borroka populazioaren sektore batzuk kriminalizatzeke eta politika arrazistak egiteko erabiltzen diren ohiko adibide baten aurrean gaude? *Pikara Magazine* aldizkari digitalean Brigitte Vasallok, *Vienen a violar a nuestras mujeres* artikuluan azpimarra lekuz aldatu du: sexu erasoak erdigunean, eta ez erasotzailearen kolorea, klasea edo erlijioa. Ondoko lerroetan artikularen pasarte batzuk dituzue itzulita:

"Gertaera horren berezitasuna erasotzaileen balizko jatorrian fokua jarri izana da. Afrika iparraldekoak. Atzerritarak. Xehetasun hori azpimarratzea biziki kezagarria da. Tranpa da. Europa ez da bihurtu feminista Urte Berriarekin, baizik eta beti bezain arrazista izaten jarraitzen du. Jai giroan gertatzen diren sexu eraso guztiek, izan Kolonian, Cairon edo Bartzelonan, amankomunean dutena ez da erasotzaileen jatorria edo kolorea, baizik eta erasotzea sexualitatearen zati bat izan daitekeela pentsarazten dieten eraiakuntza. Erasotzaileak ez dira zuriak edo bel-

tzak, kristauak edo musulmanak: maskulinitate hegemonikoan eraikitako gizonak dira. Ez gehiago, ez gutxiago.

Bortxatu gaituztenak beste batzuk izan direlako aztoratu da eremu atzerakoiena. Eta gu gure gizonak baino ez gaituzte bortxatzen. Bortxaketaren kultura sasoi betean dago eta salatzen saiatze hutsak indarkeria itzela sortzen du. Parranda gauean mila gizonak emakumeak erasotzea ez da delinkuentziaren dimentsio berria: betiko dimentsioa da.

Egin duten jokoak *purplewashing* izena du: tankera faxista eta arrazistako errepresio politikei aurpegi garbiketa feminista egitea. Xenofobiari jaten eman 'gure emakumeak', 'gure homosexualak', 'gure pertsona transak' defendatzeko. Horiek bat-batean mehatxatu dituzte ar oldarkor eta LGTBI-fobikoek, zeinak gure paradisu mugetz haratagotik datozen.

Arrazagatiko zapalketari arretarik jarritzen ez dion feminismoa bezain ezdeusa izango da generoa aintzat hartzen ez duen arrazakeriaren kontrako borroka. Hondamendi beraren zati dira, premiazoak dira aliantzak. Bortxaketak salatzea ez dezaten erabili arrazakeria eraikitzeke, beti salatzeke aukera izan dezagun, beti egunkarrietan atera dadin, beti alkateek premiazo neurriak har ditzaten. Neurriek behar duten tokian eragin dezaten: ez klasean, ez arrazan, ez jatorrian. Baizik eta maskulinitate gerrero, konkistatzaile eta bortxatzailearen eraikuntzan".

EKONOMIAREN TALAIAN

Denak ez dira Ogasuna




Juan Mari Arregi

Espainiako erregearen arreba sustan erretzetik salbatu nahian dabilen Dolores Ripoll Estatu abokatuak arrazoi zuen auzitegian handikiro esan zuenean "Ogasuna denok gara" esaldia publizitate hutsa dela eta ezin zaiola "zuzenbideari aplikatu". Honakoa ere gehitu beharko luke: "Batez ere erregearen arrebari edo monarkiako kide bati dagokionean". Egia da, "Ogasuna denok gara" publizitate-slogan bat baino ez da, errealitateak hori erakusten du.

Lan egin eta euren soldatekin hilerio zergak ordaintzen dituzten langileak Ogasuna dira ordea. Estatu diru-kutxak langile klaseak ordaindutako zergekin elikatzen dira batez ere. Diru gehiago dutenek ingeniaritza fiskalaz asko dakite, baita zergak ordaintzea saihesteaz ere. Hor daude milaka milioi euro -tartean euskal herritar askoren dirua- ezkututzen dituzten paradisu fiskalak. Hor daude legalak izan arren aberatsen mesederako diren SICAVak, %1 baino ez tributatu. Hor daude sozietateen gaineko zergari iskin egiten dioten enpresak. Zerga hori ordaintzen dutenek, aldiz, %16 besterik ez dute ekartzen, %30 izan beharko lukeenean -multinazionalak %6 ordaintzen dute-. Eta hortxe daude askotan beltzean kobratu ohi duten profesional liberalak: abokatuak, notarioak, medikuak, dentistak eta abar. Horren guztiaren aurrean, erreforma fiskalek boteretsuen alde egiten dute, langileak zerga handiagoak jasan behar dituen bitartean.

Egoera hori aldatzeko, langileria eta herritarren gehiengoaren zerbitzura egongo diren gobernuak behar dira. Kontserbadoreek, edo eskuindarrek, ez dute balio. Jakingo al dute hori egiten euren burua arrerakoi eta ezkerrekotzat dutenak? Erakutsi dezatela.



Ustelkeriaren mapa Herrialde Katalanetan

KATALUNIA. Politikarien eta enpresa pribatuen arteko erlazio ustelak, diru publikoaren lapurreta, fabore politikoak, interesen salerosketa, iruzur fiskala... Ustelkeria kasuen salaketa kopuruak ez du etenik Herrialde Katalanetan. Independentziaren bidea jorratzen ari den Kataluniako Printzerriko herritarrek oso kontuan izan beharko dute ustelkeriaren aurkako txertoen garrantzia: gardentasuna eta inpunitate-eza, Estatu berriaren eraikuntzak loturarik eduki ez dezan politika instituzionala gutxi batzuen onurako bidea dela uste eta praktikara eraman dutenekin. Irudia tamaina handian ikusteko, sartu argia.eus-en.

Independentziaz galdeketa Azpeitian eta Diman

Eñaut Agirrebengoa Apaolaza
@eagirrebeng

2018ra bitarte ahalik eta herri galdeketa gehien egitea da Gure Esku Dagok eskuartean duen erronka. Galdeketa iragarri dituzte Azpeitian eta Diman.

Azpeitia
Ekainaren 12an egingo dute galdeketa Azpeitian, orain arte galdeketa egin duen herririk handiena. "Nahi al duzu izan euskal estatu independente bateko herritar?" itaunari baiezkoa edo ezezkoa erantzun beharko diote herritarrek.

Dima
Ekainaren 19an egingo dute independentziari buruzko galdeketa, Goierriko 22 herriekin batera. Gure Esku Dagoren ekimenez Alkarragaz izeneko elkarteak sortu dute, galdeketa aurrera eramateko. Talde horretako kideak izango dira itaun zehatzak erabakiko dutenak.

Aitzindariak
Etxarri Aranatzen, %42,7ko parte-hartzearekin, %94ak baietz erantzun zion "nahi al duzu Euskal Herri independente bateko herritarra izan?" galderari. Arrankudiagan, %61,5ak parte hartu eta %89ak erantzun zuten baietz.

POBREZIA



62

aberatsenek, munduko biztanleriaren erdiak (3,5 bilioi herritarrek) adina diru daukate une hauetan, Oxfam erakundearen arabera.

7,6 trilioi dolar inguru paradisu fiskaletan dute gordeta, zergei muzin egiteko. 62 aberats horien ia erdia estatubatuarrek dira eta 17 europarrak.



SORTZEN-EK 25 URTE

Eskola herritarra, demokratikoa, euskalduna, anitza eta hezkidetzan oinarritua defendatzen du Sortzen elkarteak. Bestek beste balio horien inguruko ekitaldiak antolatzen dituzte aurtur. Maiatzaren 22an, aldarrikapen eguna egingo dute *EskolHarria*, *biharko herria* lelopean.



DURANGALDEA AUTOGESTIORANTZ

Autogestioaz gogoetatzeko eguna antolatzen dute Durangon, urtarrilaren 30ean. "Herritarren ahalduntzea dakarren eta sistemaren alternatiba izan nahi duen proiektu oro" identifikatu, elikatu eta zubiak eraikitzea da asmoa.



UNIBERTSITATEA DOAKOIA TXILEN

Milaka ikasle, guraso eta eragile txiletarrek doako eta kalitatezko hezkuntza aldarrikatu dute urtean. Borroka horren fruituak ikusteari dira: martotik aurrera unibertsitatea doakoa izatea onartu berri du Txileko Kongresuak.